

MKPASIP MUSTARD YE LEAVEN

Matthew 13:31-33

ỌYỌHỌ UKPEP-ŃKPỌ 77

Eke Ikpọ Owo

IKỌ IBUOT: “Yak ubọñ Fo edi; Yak inam uduak Fo; Nte enamde ke Heaven, yak inam ke isọñ kpasuk ntre” (Matthew 6:10).

I Ekpri Ẹtọñọ Obio-ubọñ

1. Eda Obio-ubọñ Heaven edomo ye mkpasip mustard, Matthew 13:31
2. Owo ekemen mkpasip mustard oro ọkọtọ ke iñwañ esie, Matthew 13:31; 13:37, 38
3. Eda mkpasip mustard nte andikpri ñkan ke kpukpru mkpasip, Matthew 13:32; 17:20

II Ubom Obio-ubọñ Ke Akpatre

4. Ke mkpasip mustard ọkọride, enye akabare edi andikpon ñkan ke otu mme mbiet, Matthew 13:32; Mark 4:32
5. Enye ebiet eto eti-eti ke idaha esie, Matthew 13:32; Ezekiel 17:22-24
6. Mme ñkọk esie edi edidiọñ enọ mme inuen enyọñ, Matthew 13:32; Genesis 12:3; Isaiah 2:2-4

III Ẹkọri Obio-ubọñ Emi Owo Mikwe Ke Enyin

7. Mme ñkpọ emi ebañade Obio-ubọñ Heaven ebiet ñke leaven, Matthew 13:33
8. Ẹwan kiet ama ada leaven esin ke udomo ndom-uyo ita, Matthew 13:33; Luke 17:20, 21
9. Ntak emi esinde leaven edi man enye ofuri ebok uyo ofut, Matthew 13:33, 4:23; 24:14

SE EKPEPDE EBAÑA

Ke Jesus nditop mme utibe ñke emi, eketiñ abaña “ndibe ñkpọ Obio Ubọñ Heaven” (Matthew 13:11). Ndien nte akaka, ke anam ndusuk “ndibe ñkpọ” emi añaña ke mme ñke emi Enye okotopde. Ke ñke Asuan-mkpasip, nnyin ikut ite ke ana ibọ “mme ikọ” Esie ukem-ukem nte esuande, koro, “mme ikọ oro ñketiñde nnọ mbufo edi spirit enyuñ edi uwem” (John 6:63). Ntem ke etọ Obio-ubọñ emi ke esit owo kiet-kiet. Ke ñke Ibokpot ye Idiok-mkpasip, Enye ekpep ete, nte Ikọ Uwem Esie ọkọride ke esit, ntre ke etọ “nditọ Obio Ubọñ Heaven” mi ke isọñ.

Ke mme ñke emi, Jesus etiñ abaña nte owo kiet-kiet edide eyen utibe Obio-ubọñ oro. Edi ke mme ñke iba emi enade nnyin ke iso, Enye otim emen Obio-ubọñ emi owut ọyọhọ-ọyọhọ, koro Obio-ubọñ Heaven otim okpon akan ndibe-ñkpọ ke esit owo. Ẹtọñọ emi ekeme nditie nte ekpri ye ñkpọ eke midighe akpan ñkpọ ke enyin ndusuk owo, ntre ñko ke mmọ edi, ke edade edomo ye se iditibede ke ini iso; koro Jesus ekpep nnyin ete ke “ñkpri ñtọñọ” emi eyeka iso ekọri nte ekpri mkpasip mustard, ndien usen kiet, Obio-ubọñ emi eyeyọhọ ofuri iso isọñ. (Daniel 2:35-44).

Mkpasip Mustard

Mkpasip mustard edi ekara-ekara ye ata ekpri, ke ñke eset ekesida enye nte andikpri ñkan ke otu mme mkpasip. Ini kiet, nte Jesus enemede nneme ye mbet Esie, ọdọhọ ete, “Edieke mbufo ekpenyenede mbuqtidem nte mkpasip mustard, mbufo ekpedọhọ obot emi ete, daha kpọñ otọ emi, kọwuhọ ko, ndien enye eyedaha: baba ñkpọ kiet idinyuñ isọñke ikan mbufo” (Matthew 17:21). Enye ikọdọhọke ite, “Nte ñkwa ntan kiet,” koro ntan minyeneke uwem; edi mkpasip mustard, okposuk edi nte enye ekpride, enyene utibe ndedibe-ñkpọ edide uwem, onyuñ ekeme ndikọri. Ndien mbuqtidem ata anditiene-Christ edi odu-uwem mbuqtidem, ñko oto ke edikop Ikọ Abasi enye ọkọri (Ẹwed Mbon Rome 10:17).

Jesus ama otim enen ke ndimek ata ekpri mkpasip emi, ndida ñwut ekpri ñtọñọ Obio-ubọñ, koro Obio-ubọñ Heaven edi obio ukara emi ọyọhọde ye uwem; Edidem esie onyuñ edi “eriset ye uwem” ndien ekeme ndikọri. “Owo” ekemen mkpasip emi otọ ke “iñwañ” esie. Sia Asuan-mkpasip ke mme ñke iba eken ekedide Eyen Owo, nnyin imekeme ndidọhọ ite ke edi kpa Enye edi Asuan-mkpasip ke ñke enye emi ñko, ndien “iñwañ” Esie ñko edi ererimbot. Utom Jesus ke ndibọp Obio-ubọñ Heaven ọkọtọñọ mi ke isọñ.

Ke ñtọñọ ini Eti-mbuk, John ọduok-owo-mmọñ, andibem Edidem iso, ọwọrọ owut idem; ndien se enye okofioride ekedi, “Ekabare esit; koro Ubọñ Heaven ke ekpere.” Ke ọfiọñ itiokiet ama ekebe, Jesus ama ọtọñọ utom Esie, ndien Enye ñko etiñ abaña ikot erikabare esit; ke kpukpru ini utom Esie; Enye ọkọkwořọ “Eti-mbuk Ubọñ Abasi emi.” Obio-ubọñ Heaven emi Enye ekedide nditọñọ ekesidu kpukpru ini ke mme ukpep-ñkpọ Esie. Emi ekedi ñwọrọ-nda ukpep-ñkpọ ke akwa akam emi Enye ekekpepde mbet Esie, “Yak Ubọñ Fo edi; Yak inam uduak Fo; Nte enamde ke Heaven; yak inam ke isọñ kpasuk ntre.” Ke ekpri ini emi enye akanamde utom, ema etọ “mkpasip mustard.” Ema etọ ñtọñọ Obio-ubọñ, enye onyuñ ọkọri; koro Enye ama osio mme isuñ-utom ye mbet

Esie ọdọṅ onyūn ọṅọ mmọ odudu ete ekwọrọ kpasuk Eti-mbuk Obio-ubọṅ emi. Idaha Obio-ubọṅ Heaven emi, okposuk edi nte owo mikemeke ndikut ke enyin, ekeme nditie nte ekpekpri, edi Jesus enyene ńkpọ efen nditiń mbańa Obio-ubọṅ emi nnọ nnyin.

Andikpon ńkan Ke Otu Mme Mbiet

Mme asańa-isań emi esimde Edisana Obio etiń eṅọ nnyin ete ke uduot mustard emi Jesus eketińde abańa ke ọkọkọri ediye-ediye ke Palestine, onyūn ọniọń ke idaha ńko tutu akabare etie nte eto akan mbiet. Utibe mbiet emi ọtọńde ke ekpri mkpasip onyūn ọkọride ọwọrọ akamba eto, edi idiọńọ emi Jesus akadade owut akpatre ubom Obio-ubọṅ Heaven. Mme anditiń ntiń-nnim ikọ Akani Ediomi, ke ndiduńqre ndibe-ńkpọ ke mme eńwọńọ eset, ema eda ekut utibe Obio-ubọṅ oro, ndien edara ke se spirit ekemende owut mmọ, etiń ebańa ubom esie, enyūn ekwo ebańa mme edidiọń esie.

Ezekiel, anditiń ntiń-nnim ikọ, ke ndiwet mbańa Obio-ubọṅ emi, ema eṅọ enye idiọńọ eke ebietde ńke emi isuk ikpepe ibańa mi. “Ntem ke Ọbọń Jehovah ọdọṅ ete, Ami nyenyūn nda nsom edikoń cedar, ntọ enye ke isoń; nyekibi ibuot nsehe ńkọk esie, ndien ami nyetọ enye ke obot eke okońde onyūn emenerede ke enyọń: nyetọ enye ke edikoń obot Israel: ndien enye eyesiaha ńkọk, onyūn ońwum mfri, onyūn akabare edi ata akamba cedar! Ndien kpukpru inuen kpukpru oruk mba eyeduń ke idak esie; mmọ eyeduń ke mfut ńkọk esie” (Ezekiel 17:22, 23).

Isaiah akada Obio-ubọṅ emi odomo ye akwa obot emi okońde akan kpukpru mme obot: “Ndien ama ekem ke utit eyo, obot ufọk Jehovah eyewuhọ ke enyọń ikpọ obot, onyūn okoń akan ńkpri obot; ndien kpukpru mme idut eyebuńọ eduk ke esit. Ndien ediwak obio eyeka ekedọṅ, ete Mbufo edi, nnyin idọk ke obot Jehovah, ke ufọk Abasi Jacob; ndien enye eyekpep nnyin ido esiemọ, nnyin iyenyūn isańa ke usuń esie: koro mme ewuhọ eyeto ke Zion, uyo Jehovah eyenyūn oto ke Jerusalem. Ndien enye eyekpe ikpe ke otu mme idut, onyūn ebieri ikọ ọṅọ ediwak obio: ndien mmọ eyeda ofut mmọ edom ńkpọ ufuń isoń, eda eduat mmọ edom ikwa udiọń vine: Idut idimenke ofut itiene idut, mmọ idinyūn ikpepe aba ekọń,” (Isaiah 2:2-4).

Daniel ke ini akabarede ndap Nebuchadnezzar, ada Obio-ubọṅ emi odomo ye itiat: “Ndien ukwak oro, ye mbat-eso, ye okpoho, ye silver, ye gold enuaha mbak-mbak, enyūn ekabare ebiet mbio emi otode ke ọtọ ubek-ibokpot ke nda-eyo, ndien ofum ọkpọri mmọ efep, ndien ikwe aba ebiet eke mmọ edude. Ndien itiat oro akanuakde mbiet akabare edi akamba obot, onyūn ọyọṅ ke ofuri isoń... Ndien ke eyo ndidem oro, Abasi enyọń eyenam ubọń eke midisoboke ke nsinsi, adaha ada: ndien idikpọńke ubọń emi inọ mbio efen: enye eyenuak onyūn ama kpukpru mme idut emi, ndien enye eyeda ke nsinsi” (Daniel 2:35-44).

Zechariah etiń ọṅọ nnyin abańa Edidem eke editọńde onyūn akarade Obio-ubọṅ emi: “Ndien Jehovah eyedi edidem ofuri isoń emi; ke usen oro Jehovah eyedu kierakiet, ye enyiń esie kierakiet” (Zechariah 14:9); ndien Isaiah etiń ediye-ediye abańa nti-ido Edidem emi, ye idaha ye ńkọri ukara Esie. “Koro eyen amanade ọṅọ nnyin, eṅọ nnyin eyen-eren: ubọń onyūn odoro enye ke afara; enyūn esio enye enyiń, Ọṅọ-item, Ọkpọsọń Abasi, Nsinsi Ete, Ọbọń Emem, Ubọń ye emem ididopke ndikọri ke ebekpo David, ye ke itie ubọń esie, man onim enye, onyūn ọsọń owuk enye ke ikpe ye ke edinen ido, emi ye ke nsinsi. Ufup Jehovah mme udim eyenam ńkpọ emi” (Isaiah 9:6, 7).

Jesus edi Edidem oro. Ibighike Enye eyekpọń ebekpo mkpe-ubọk Esie man edida ukara tọsin isua mi ke isoń. Do ke Enye edinam mme ntiń-nnim ikọ ewọrọ esu. Ini oro ke edibọrọ akam mme emana: “Yak Ubọń Fo edi; Yak inam uduak Fo; Nte enamde ke Heaven, yak inam ke isoń kpasuk ntre.” “Koro nnyin imọfiọk ite” nte Paul ọdọṅde, “Ofuri ekondo ke omum mmum, onyūn odu ke ubiak uman tutu osim emi. Idighe ntre ikpọń, edi nnyin ke idem nnyin ńko-ńko, emi inyenede akpa mfri Spirit, nnyin ke idem nnyin ke imomum mmum ke esit nnyin, itie ibet ini eke edidade nnyin isin ke ubon Abasi, oro edi, ini eke edifakde ikpọhidem nnyin” (ńwed Mbon Rome 8:22, 23).

Isuńi eke idiọk-ńkpọ akadade ọṅọ kpukpru iso isoń, edi mbiomo ọṅọ kpukpru ubon-owo, ndien iduhe baba ukara owo emi ekemede ndimen isuńi oro mfep. Ibọṅke ke Jesus ama ọdọk ebekpo David onyūn akara ke edinen-ido, adańoro ke edimen isuńi oro efep. Ini oro ke akpa-utatan edisehe nte rose. Do ke “eto mustard” edikọri ikpon man inuen eduń ke mme ńkọk esie, koro ke ini oro ke eńwọńọ emi ekenode Abraham ediwọrọ osu: “ndien oto fi kpukpru oruk ererimbot eyekut mfọń.”

**Obio Ubọń kedi,
O! tiń mbuk emi,
Eyemenere banner Jehovah!
Ererimbot eyeyọṅ
Ye ifiọk y’ubọń Esie,
Nte mmọń ke inyań!**

Leaven Ye Ndom-Uyo

Mme Jew, ke ini Jesus okodude ke otu mmọ, ekeyom Obio-ubọṅ oro ke isoń, koro ema etim etiń ebańa ubom ye ubọń esie, enyūn eńwọńọ ediwak ke ini Akani Ediomi nte enye editọńde, nte nnyin ikutde ke mme ufań-ńwed

emi ima ikokot ke ukpep-ñkpọ emi. Edi mme udim owo oro, kpa ye mbet Jesus, ekeyom Obio-ubọñ eke ọyọhọde ye ubọñ ye odudu isọñ. Mmọ ikenyeneke ifiọk ibaña Obio-ubọñ eke Spirit emi Jesus ọkọkwọrọde abaña. Emi ekedi ata ndibe-ñkpọ. “Edi ke ini mme Pharisee ebupde Enye ini eke Ubọñ Abasi edidide, Enye ọbọrọ mmọ ete, Ubọñ Abasi idighe ke ido nte owo okutde enye ke enyin: owo idinyuñ idọhọke ete, Se enye mi; midighe, Se enye do: koro sese, Ubọñ Abasi odu ke otu mbufo” (Luke 17:20, 21).

Otim ańwaña ke mme ikọ emi ete ke Jesus eketiń abaña akpa ńtọñ Obio-ubọñ Esie, kpa Eti-mbuk emi, ini emi Obio-ubọñ emi ima ikebemisọ ikpep ibaña nte ọtọñde ke esit owo, inyuñ iwọrọke kaña iwut idem ke ererimbot. Ndien edi idaha ntem ke nnyin inim ke akpanikọ ite ke leaven emi odude ke ndom-uyo edi mbiet. “Leaven,” ke ndinam udomo ndom-uyo ita oro ofut, edi ukem-ukem nte Eti-mbuk akade iso ke ndibe ke ata utibe usuñ ke ererimbot ke Emana Mfọn emi. Nwan emi ama “odip” leaven emi ke ndom-uyo. Ntre ńko ke “ndibe-ñkpọ Obio Ubọñ Heaven” edibe mme andisin Christ. Okposuk edi edide ntem, “Eyenyuñ ekwọrọ gospel Ubọñ Abasi emi ke ofuri ekondo nte ntiense enọ kpukpru mme idut”; tutu leaven akara “ofuri” udomo ndom-uyo “ndien adańoro ke utit eyedi.”

Abasi ke anana-utit ifiọk Esie okut ete odot ndimek ererimbot eke idiọk-ñkpọ ọyọhọde ke esit nte “ińwan” Esie, ndinam akakan Obio-ubọñ Esie ọwọrọ osu, kpa nte mme anditiń ntiń-nnim ikọ eketińde. Mi ńko ke Enye osuk emek onyuñ anam nditọ Obio-ubọñ Esie efọn ema. Mi ke nnyin ińwana “eti eńwan mbuotidem”. Ndien okposuk edi “eńwan” emi ekpetiede nte eke unana idorenyin ke iso ndusuk owo, edi Jesus akada enye edi ke ererimbot kpa “gospel Obio Ubọñ emi” eke Enye ye mme isuñ-utom Esie ekekewọrọde, emi Enye akadade eberede usuñ Mfọn ọnọ kpukpru ubon-owo, idut ye usem. Eti-mbuk emi akananam iduokke odudu esie. “Ọbọñ oro ọdọhọ isuñ-utom esie ete, Wọrọ ke mme ọkpọusuñ ye ke mme mben-ọkọ, nyuñ yire mmọ eduk edi, **man ufọk Mi ọyọhọ**” (Luke 14:23).

“Utom emi ekpenamde ke mme isua

Ana okpon ke usop utin

Ke kpukpru ebiet ana etiń

Enyiń Andinyaña ata usọp-usọp”

MME MBUME

1. Ke didie ke “mkpasip mustard” ebiet Obio-ubọñ Heaven?
2. Anie ke “owo” emi akasuande mkpasip emi ada ọnọ?
3. Ke nso utọ usuñ ke ńkọri mkpasip mustard ebiet Obio-ubọñ Heaven?
4. Nso ke “mme inuen” emi eduńde ke ńkọk akwa eto emi eda enọ? Eda emi edomo ye ewe eńwọñọ emi Abasi ọkọńwọñde ọnọ Abraham?
5. Ke mmọn ye ke nso utọ usuñ ke ńtọñ Obio-ubọñ emi ada itie?
6. “Obot” emi ewetde ke ńwed Isaiah 2:2-4 owut nso?
7. Siak enyiń mme anditiń ntiń-nnim ikọ ke Akani Ediomu emi eketińde ntiń-nnim ikọ ebaña Obio-ubọñ emi?
8. Nso edidi akwa erikan Obio-ubọñ emi ke akpatre?
9. Ke nso utọ usuñ ke edinam “leaven” ke esit ndom-uyo ebiet se idade itie ke editọñ Obio-ubọñ.